

Qaratsap aanaartoorneratigut timip ilaanik nukillaartoornermik nappaatillit siunnerfilimik aaqqissuussaalluartunik aammalu ataqatigiissarneqartunik sungiusaanissanik ingerlatsinissani iliuusissatut pilersaaruteqarnissat pillugit Naalakkersuisut kingusinnerpaamik UPA 2016-imi Inatsisartunut aalajangiiffigisassatut siunnersuusioqquneqarnissaannik siunnersuut.
(Inatsisartunut ilaasortaq Agathe Fontain, Inuit Ataqtigiiit)

Akissuteqaat

(Peqqissutsimut Naalakkersuisoq Doris Jakobsen)

Siullermeerneqarnera

Inatsisartunut ilaasortap siunnersuutaa Peqqissutsimut Naalakkersuisutut qujassutigaa.

Qaratsakkut aanaartoorneq inuunerup naajartornerani kisimi takussaangilaq. Ajoraluartumik inuusunnerusorpassuit aamma eqqugaasarpuit. Eqqorneqarnermi kingorna ukiorpassuarni kinguneri attattussaavaat. Piginnaangorsaqqinnerup eqqugaasup naak napparsimalersimagaluarluni siornatigut piginnaaneqarfigilersimasaminik inuunermilu inissisimaffigilersimasanik piginnaaneqaqqilernissaanut piginniinnarnissaanulluunniit tapersersussavaa.

Nappaateqarsimanerup kingorna, soorlu aanaartooreernerup kingorna piginnaangorsaqqinnerup sunniutai pitsaasut ukiuni kingullerni - aamma utoqqaat napparsimmavimmiitinnerisa kingorna - uppernarsineqartarnerat annertusiartorpoq.

Assersuutigalugu piginnaangorsaaqqiilluarnerup assigiinnigissutigisinnaavaa nammineq nerisinnaanermik, imminut asattorsinnaanermik imaluunniit nammineerluni perusersartarfiliarsinnaanermik – imaluunniit taamaalorsinnaanginnermik. Nammineerluni imminut eqqiluutsuutissinnaaneq nammineq inuunermi aalajangiisinnaanermut annertuumik kiffaangissuseqartitsisarpoq, taamaammallu innuttaasut ataasiakkaat pitsaasumik inuuneqarnissaannut aamma pingaaruteqarluarluni.

Inuiaqtigiiittut pisussaaffigaarput innuttatta napparsimanerup sanngiillisimanerullu kingorna nammineernerulernissaat anguniarlugu suliniuteqassalluta. Tassani piginnaangorsaqqinnissamut ataqatigiissumik neqerooruteqartoqartarnissaa pisariaqarpoq.

Aallarniutigalugu pingaaruteqarpoq aalajangiutissallugu, piginnaangorsaqqiineq Namminersorlutik Oqartussat Kommuniillu akornanni avinneqarnikummat. Peqqinnissaqarfiup sungiusarneqarneq akisussaaffigaa kommunillu sungiusakkat ataannarnissaat akisussaaffigalugu. Piginnaangorsaqqiineq oqaasiuvoq nutaaq, inatsisitigut inissinnikuunngitsoq.

Peqqinnissaqarfiup napparsimasut qaratsamikku aanaartooreernermi imaluunniit qaratsami taqaasigut milittooreernermi kingorna kingunerlutsitsisunut maannakkorpiaq piginnaangorsaaqqittarneq annertusarpaa. Taamaalilluni napparsimmavinni tamani timinik sungiusaasunik pillorissaasunillu immikkut 2016-imi atorfinitsitsisoqassaaq. Ajoqutip suussusersineqariitsiarneranili piginnaangorsaaqqinneqarnissamik neqerooruteqartoqartarpoq, tassa innuttaasooq amerlasuutigut suli Dronning Ingridip Napparsimmavissuani uninngatillugu tamanna pisarpoq. Tamatuma kingorna pinginnaangorsaaqqinneq najukkami napparsimmavimmi ingerlateqqinneqartarpoq. Taamatut neqeroorummik ingerlatitseqqiineq najukkami sulisut telemedicinikkut ilitsersorneqarnerat aqutigalugu peqqissaavinni arlalinni isumagineqarsinnaavoq. Innuttaasorpasullu qaratsamikku aanaartoormik imaluunniit qaratsaminni taqqatigut milittoormik kingorna ajoquteqalersimasut aamma angerlarsimaffimmini ikiorteqarnissaaq immaqalu atortorissaaruteqarnissaaq pisariaqartissinnaavaat. Tamanna kommunit suliassaraat.

Naalackersuisut qularinngilluinnarpaat Naalackersuisut kommunillu akornanni suleqatigiinneq nukittorsarnissaanik pisariaqartitsisoqartoq, qaratsamikku aanaartoormik imaluunniit qaratsaminni taqqatigut milittoormik eqqugaasut ataavartumik sullinneqartarnerat qulakkeerniarlugu. Kommuninit akisussaaffik tigummineqarmat kommunit ilaatinngit Naalackersuisut periusissiamik saqqummiussaqaarsinnaangillat kiisalu aqutsinikkut, aningaasaqarnikkut allaffissornikkullu sunniutissai qulaajarneqartariaqarmata.

Taakkua saniatigut Naalackersuisut piffissami aggersumi inuit piginnaasakinnerulersimasut eqqarsaatigalugit pilersitassanik arlalinnik innarluutillit pillugit 2017-mi inatsisissamik saqqummiussisoqarnissaata tungaanut ukkassissaaq. Naalackersuisuttaaq Sisimiuni innarluutilinnut qitiusumik sullissivimmik sanatitsillutik allartippat tassanilu IPIS ilaatinneqassaaq. Naalackersuisut isumaqarput qitiusumik sullissivimmi misilittakkat ilaatinneqartarnissaat aalajangiisuulluinnartoq siunissamut pilersarusiornissami.

Tamanna tunuliaqutaralugu siunnersuutip itigartitsissutigineqarnissaa Naalackersuisut inassutigaaq.